



*La Transfiguration de Iesus-Christ, où Moÿse & Helie assistent en presence Pierre, Iacques & Iean.*

**L**E sixième iour apres que Iesus eut fait plusieurs bons enseignemens, il prit Pierre, Iacques & Iean, & les retira à part en vne haute montagne pour faire oraison; & comme il prioit, la forme de sa face fut changée, & transfigurée en leur presence, & sa face deuint resplendissante comme le Soleil, & ses vestemens reluisoient blancs comme neige: & voicy deux hommes qui parloient avec luy, qui estoient Moÿse & Helie, qui apparurent avec majesté, & disoient ce qu'il deuoit accomplir en Ierusalem. Or Pierre & ceux qui estoient avec luy estoient appesantis de sommeil. Et quand ils furent réveillés, ils virent sa Majesté, & les deux hommes qui estoient avec luy; & quand ils partirent d'avecques luy, Pierre dist à Iesus: Seigneur, faisons icy trois Tabernacles, vn pour toy, vn pour Moÿse, & vn pour Helie, ne sçachant ce qu'il disoit. Et comme il disoit ces choses, vne nuée vint qui les couurit, & ainsi qu'ils entroient en la nuée, ils eurent peur. Adonc vint vne voix en la nuée, disant; Cettuy-cy est mon fils bien-aymé, escoutez-le. Et comme la voix se proferoit, Iesus se trouua seul, & ils se teurent tous, & ne rapporterent en ces iours-là rien à personne, de ce qu'ils auoient veu.